

# ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: [prelacy@armenianprelacykw.org](mailto:prelacy@armenianprelacykw.org)

ՆՈՐ ՇՐՋԱՆ, Թ. Տարի, Թիւ 400, Ուրբաթ, 01 ՍԵՊՏԵՄԲԵՐ, 2017

ՀԱՅԿԱԿԱՆ

## Նախագահ Սերժ Սարգսեան Հասած Է Արցախի



Արցախի Հանրապետութեան նախագահ Բակո Սահակեան 30 օգոստոսին Ստեփանակերտի օդակայանին մէջ դիմաւորած է Լեռնային Ղարաբաղի Հանրապետութեան հռչակման 26-րդ տարեդարձին նուիրուած տօնական ձեռնարկներուն ծիրին մէջ Արցախի հասած Հայաստանի Հանրապետութեան նախագահ Սերժ Սարգսեանը:

## Պաշտպանութեան Եւ Զինուորական Ծառայութեան Վերաբերող Օրէնքի Նախագիծերու Ներկայացում

Հայաստանի նախագահ, Ազգային անվտանգութեան խորհուրդի նախագահ Սերժ Սարգսեան 30 օգոստոսին հրաւիրած է Ազգային անվտանգութեան խորհուրդի նիստի, որուն ընթացքին քննարկուած են «Պաշտպանութեան մասին» եւ «Զինուորական ծառայութեան եւ զինծառայողի կարգավիճակի մասին» Հայաստանի օրէնքներու նախագիծերը:

Նիստին սկիզբը ընդգծելով, որ այդ թուականէն կը սկսի սահմանադրական փոփոխութիւններով պայմանաւորուած կարեւորագոյն օրինագիծերու քննարկումներու շարքը, նախագահ Սարգսեան նշած է, որ օրակարգին վրայ ներառուած նախագիծերուն մէջ տակաւին կան բազմաթիւ հարցեր, որոնք մանրակրկիտ, բազմակողմանի քննարկման եւ յստակեցման կարիք ունին: Ան յանձնարարած է վարչապետին այդ քննարկումներուն ապահովել համապատասխան բոլոր նախարարութիւններու մասնագիտական բարձր որակով մասնակցութիւնը, որպէսզի հետագային որեւէ հարց չյառաջանայ այդ նախարարութիւններուն կողմէ օրէնքով նախատեսուած խնդիրներու իրագործման առումով:

Օրակարգի վերոնշեալ հարցերուն մասին խորհուրդի անդամներուն զեկուցած է պաշտպանութեան նախարար Վիգէն Սարգսեան, որ ժողովականներուն ներկայացուցած է քննարկուող իրաւական աքթերու ընդունման անհրաժեշտութիւնը, ընթացիկ իրավիճակը, խնդիրները եւ օրինագիծերու կարգաւորման նպատակը:

Վիգէն Սարգսեան դիտել տուած է, որ «Պաշտպանութեան մասին» օրէնքը կը կարգաւորէ Հայաստանի պաշտպանութեան կազմակերպման իրաւական հիմքերը, պաշտպանութեան բնագաւառին մէջ պետական եւ տարածքային կառավարման, տեղական ինքնակառավարման մարմիններու, պաշտօնատարներու, կազմակերպութիւններու՝ անկախ կազմակերպական իրաւական ձեւէն, զինուած ուժերու եւ այլ զօրքերու գործունէութիւնը, Հայաստանի պաշտպանութեան մասնակցելու հոլովոյթին մէջ քաղաքացիներու իրաւունքները եւ պարտականութիւնները, ինչպէս նաեւ զօրահաւաքային նախապատրաստութեան եւ զօրահաւաքի գործադրութեան վերաբերող հարցեր:

«Զինուորական ծառայութեան եւ զինծառայողի կարգավիճակի մասին» օրէնքը կը կարգաւորէ Հայաստանի քաղաքացիներուն՝ երկրին պաշտպանութեան մասնակցելու սահմանադրական պարտականութեան ծիրին մէջ քաղաքացիներու զինուորական ծառայութեան նախապատրաստութեան, զինուորական ծառայութեան ու պահեստազօրային պատրաստութեան կազմակերպման եւ իրականացման, ինչպէս նաեւ զինուորներուն, անոնց ընտանիքներու անդամներուն ու զինուորներուն հաւասար նկատուող անձերուն իրաւական եւ ընկերային երաշխիքներուն կապուած նախաձեռնութիւնները:

Պաշտպանութեան նախարարը խորհուրդի նիստին ներկայացուցած է նաեւ կառավարութեան եւ Ազգային ժողովին մէջ յիշեալ օրինագիծերու քննարկումներու ժամանակացոյցը, ըստ որուն, համապատասխան բոլոր նախարարութիւններէն արդէն ստացուած եզրակացութիւններու հիման վրայ մշակուած նախագիծերու քննարկումները պիտի սկսին այսօր՝ 31 օգոստոսին:

## **Քանատայի Խորհրդարանական Պատուիրակութիւնը Հանդիպումներ Ունեցած Է Հայաստանի Բարձրաստիճան Պաշտօնատարներուն Հետ**

28 օգոստոսին Երեւան հասած է Քանատայի խորհրդարանական պատուիրակութիւնը, որուն ղեկավարն է «Մէկ ազատ աշխարհ» հասարակական կազմակերպութեան ղեկավար Մաժետ Շաֆին: Պատուիրակութեան մաս կը կազմեն Քանատայի խորհրդարանի ստորին պալատի Պահպանողական կուսակցութեան երեսփոխաններ Ռաքել Հարտըրը եւ Թոնի Քլեմընտը: Պատուիրակութեան կ'ընկերակցի Քանատայի Հայ դատի յանձնախումբի Օթաուայի գրասենեակի գործադիր տնօրէն Սեւակ Պելեան:



29 օգոստոսին պատուիրակութիւնը հանդիպումներ ունեցած է Հայաստանի Հանրապետութեան Ազգային ժողովի նախագահին, արտաքին գործոց նախարարին եւ պաշտպանութեան նախարարին հետ: Պատուիրակութեան հետ հանդիպած են նաեւ Հայաստանի Հանրապետութեան Ազգային ժողովի ՀՅԴ խմբակցութեան ղեկավար, ՀՅԴ Բիւրոյի քաղաքական ներկայացուցիչ Արմէն Ռուստամեանն ու ՀՅԴ խմբակցութեան անդամ, Հայաստան-Քանատա խորհրդարանական բարեկամութեան խումբի անդամ Արմէն Բարայեանը:

30 օգոստոսին պատուիրակութիւնը մեկնած է Արցախ: Հայաստանի Հանրապետութեան Ազգային ժողովի նախագահ Արա Բարլոյեան 29 օգոստոսին ընդունած է «Մէկ ազատ աշխարհ» հասարակական կազմակերպութեան ղեկավար Մաժետ Շաֆիի գլխաւորած պատուիրակութիւնը:

Արա Բարլոյեան շնորհակալութիւն յայտնած է պատուիրակութեան ղեկավարին եւ քանատացի խորհրդարանականներուն Արցախ այցելելու որոշումին համար՝ նշելով, որ այնտեղ անոնք անաչառ տեղեկատուութիւն պիտի ստանան թէ՛ Արցախի, թէ՛ Լեռնային Ղարաբաղի տագնապին մասին:

Հայաստանի Հանրապետութեան Ազգային ժողովի նախագահը բարձր գնահատած է Քանատայի օրէնսդիր եւ գործադիր մարմիններուն կողմէ Հայոց ցեղասպանութիւնը ճանչնալու հանգամանքը՝ փաստելով, որ այսօր ալ Թուրքիոյ իշխանութիւնները, շարունակելով ժխտել այդ փաստը, կը ցուցաբերեն նոյն մօտեցումները, ինչ որ 102 տարի առաջ կ'ընէին: Հայաստանի Ազգային ժողովի նախագահը, օրինակ բերելով Գերմանիոյ եւ Իսրայէլի հաշտութեան փաստը,

նշած է, որ անազնությունն բերը տակալին կը ծանրանայ պաշտօնական Թուրքիոյ վրայ, եւ ի տարբերութիւն նախորդ տարիներուն՝ այսօր Թուրքիան յետընթաց կ'ապրի մարդու իրաւունքներու պաշտպանութեան առումով:

Արա Բաբլոյեան կարելոր նկատած է Քանատայի վարած քաղաքականութիւնը, որ տարբեր ազգութիւններու եւ դաւանանքներու պատկանող մարդոց առիթ կու տայ լիարժէքօրէն դրսեւորուելու եւ արտայայտուելու: Արա Բաբլոյեանի համաձայն, մարդու իրաւունքը բարձրագոյն արժէք է՝ անկախ ազգութենէ եւ դաւանանքէ. պէտք է յարգել կրօնական պատկանելիութիւն ունենալու, ընտրելու իրաւունքը:

Արա Բաբլոյեան նշած է. «Ուրախ եմ, որ պիտի այցելէք Արցախ: Այնտեղ կը ծանօթանաք խաղաղասէր ու ազատատենչ ժողովուրդի մը եւ պիտի համոզուիք, որ ճիշդ ուղիին վրայ էք՝ պաշտպանելով արցախցիներուն ազատ ապրելու իրաւունքը»:

Հայաստանի Հանրապետութեան Ազգային ժողովի նախագահին համաձայն արցախցին, ի տարբերութիւն ազրպէյճանցիին, կը պաշտպանէ իր տան մէջ խաղաղ ապրելու իրաւունքը:

Ընդգծելով խորհրդարանական դիւանագիտութեան դերը երկկողմանի յարաբերութիւնները զարգացնելու մէջ՝ Արա Բաբլոյեան կարելոր նկատած է Հայաստանի եւ Քանատայի խորհրդարաններուն մէջ գործող բարեկամական խումբերու գործունէութիւնը՝ նշելով, որ մեր երկիրը շահագրգռուած է զարգացնելով համագործակցութիւնը բոլոր մարզերուն մէջ:

Մաժետ Շաֆի շնորհակալութիւն յայտնած է ընդունելութեան համար՝ ներկայացնելով պատուիրակութեան անդամները եւ այցելութեան նպատակը: «Մէկ ազատ աշխարհ» հասարակական կազմակերպութեան ղեկավարը նշած է, որ անցեալ տարի ակնատես եղած է Ազրպէյճանի կողմէ Արցախի նկատմամբ կիրարկուած զինուորական գործողութիւններուն, որոնց գոհ գացած են թէ՛ զինուորականներ եւ թէ՛ խաղաղ բնակիչներ:

Հասարակական կազմակերպութեան ղեկավարին համաձայն, Ազրպէյճանի կողմէ Լեռնային Ղարաբաղի տագնապը կը ներկայացուի իբրեւ կրօնական եւ ոչ թէ քաղաքական տագնապ. այսպիսի մօտեցում, անշուշտ, շահաւէտ է Ազրպէյճանին:

Հանդիպումի աւարտին Արա Բաբլոյեան նշած է, որ դարեր շարունակ քրիստոնէութիւն դաւանող հայ ժողովորդը այսօր ալ կ'ընթանայ խաղաղութեան մէջ ապրելու եւ արարելու ճամբով. ատիկա հիւրերը կը տեսնեն Արցախի մէջ:

29 օգոստոսին արտաքին գործոց նախարար Էդուարդ Նալբանդեան ընդունած է Քանատայի խորհրդարանական պատուիրակութիւնը՝ «Մէկ ազատ աշխարհ» կազմակերպութեան ղեկավար Մաժետ Շաֆիի գլխաւորութեամբ:

Ողջունելով Քանատայի խորհրդարանի երեսփոխանները՝ նախարար Նալբանդեան կարելոր նկատած է քանատացի խորհրդարանականներուն պարբերական այցելութիւնները եւ անոնց ներդրումը երկկողմանի յարաբերութիւններու զարգացման գործին մէջ:

Շնորհակալութիւն յայտնելով ընդունելութեան համար՝ քանատացի խորհրդարանականները ներկայացուցած են «Մէկ ազատ աշխարհ» կազմակերպութեան՝ մարդու իրաւունքներու պաշտպանութեան ուղղուած գործունէութիւնը, ինչպէս նաեւ Հայաստան եւ Արցախ իրենց փաստահաւաք առաքելութեան նպատակը՝ ուսումնասիրել անցեալ տարուան Ազրպէյճանի ապրիլեան յարձակումին ընթացքին կատարուած մարդու իրաւունքներու կոպտագոյն խախտումներն ու զինուորական յանցագործութիւնները եւ զեկուցում պատրաստել անոնց մասին:

Հիւրերուն խնդրանքով նախարար Նալբանդեան ներկայացուցած է դարաբաղեան տագնապի խաղաղ լուծման ուղղութեամբ Հայաստանի եւ ԵԱՀԿ-ի Մինսքի խմբակի համանախագահներուն կողմէ գործադրուող միացեալ ջանքերը, անդրադարձած է ապրիլեան յարձակումներուն ընթացքին Ազրպէյճանի զինուած ուժերու գործած զինուորական յանցագործութիւններուն:

29 օգոստոսին Հայաստանի պաշտպանության նախարար Վիգեն Սարգսեան ընդունած է քանատագի երեսփոխանները: Հանդիպումին ընթացքին քննարկուած հարցերու շրջագիծին մէջ անդրադարձ կատարուած է դարաբաղեան տագնապին եւ Հարաւային Գոժկասի մէջ շրջանային անվտանգութեան ապահովման հարցերուն:

Նախարար Վիգեն Սարգսեան հիւրերուն ներկայացուցած է դարաբաղեան տագնապին նախապատմութիւնը, խաղաղ լուծման հոլովոյթը եւ շփման գիծին մէջ տեղի ունեցած զարգացումները՝ յատկապէս ապրիլ 2016-ին Արցախի Հանրապետութեան դէմ Ազրպէյճանի զինուորական գործողութիւնները եւ այդ ընթացքին վերջինիս զինուած ուժերուն կատարած զինուորական յանցագործութիւնները:

## **Ուաշինկթընի Մէջ Խաղաղ Ցուցարարներու Դէմ Յարձակումին Գործով Էրտողանի Թիկնապահներուն Մեղադրանք Առաջադրուած Է**

Ուաշինկթըն նահանգի դատարանը ընդլայնուած կազմով որոշում տուած է մեղադրականներ ներկայացնելու Միացեալ Նահանգներու մայրաքաղաքին մէջ 16 մայիս 2017-ին խաղաղ ցուցարարներու դէմ յարձակում գործած 19 անձերու, ներառեալ Թուրքիոյ նախագահ Ռեճեփ Թայիփ Էրտողանի 15 թիկնապահներու դէմ: «Արմէնփրես» կը տեղեկացնէ, որ այս մասին կը հաղորդէ «Ուաշինկթըն Փոսթ»:



Քոլումպիայի շրջանի դատախազի գրասենեակէն յայտնած են, որ 19 անձի դէմ մեղադրանք ներկայացուած է բռնութեան նպատակով դաւադրութիւն կազմակերպելու գործով: Մեղադրականին համաձայն, ենթադրեալ դաւադրութեան նպատակը եղած է յարձակիլ ու հարուածել Ուաշինկթընի մէջ Թուրքիոյ դեսպանի նստավայրին դիմաց հաւաքուած ցուցարարները, ինչպէս նաեւ յարձակիլ այն ոստիկաններուն վրայ, որոնք կը փորձեն դադրեցնել յարձակումը:

Դատախազի գրասենեակէն տեղեկացուցած են նաեւ, որ մեղադրեալներէն երկուքը ձերբակալուած են, իսկ միւսները կը շարունակեն մնալ ազատութեան մէջ: Տակաւին յստակ չէ, թէ ո՛ր կը գտնուին միւս մեղադրեալները եւ արդեօք դիւանագիտական անձեռնմխելիութիւնը կրնա՞յ խանգարել անոնց դէմ հետաքննութիւն կատարելը: Ամերիկայի Հայ դատի գրասենեակէն կը յայտնեն, որ 19 անձի դէմ ներկայացուած մեղադրանքներով (ատելութեան ենթահողի վրայ գործուած յարձակում) կը նախատեսուի սահմանել պատիժ մինչեւ 15 տարուան բանտարկութեան չափով: Գրասենեակի հաղորդակցութեան բաժինի ղեկավար Եղիսաբէթ Չուլճեան մեղադրականներու ներկայացումը նկատած է կարեւոր քայլ: «Ժամանակն է պահանջելու Էրտողանի անվտանգութեան աշխատակիցներու անյապաղ արտայանձնումը, իսկ Թուրքիոյ Հանրապետութիւնը պէտք է փոխհատուցէ այդ սարսափելի յանցագործութենէն վնասուածներուն», նշած է Չուլճեան:

Նշենք, որ յարձակումին մասնակից Միացեալ Նահանգներու երկու թուրք քաղաքացիներ արդէն ձերբակալուած են: Անոնց դէմ այս հարցով առաջին դատական նիստը տեղի պիտի ունենայ 7 Սեպտեմբերին:

## Նախարար Լեւոն Մկրտչեան Անգամ Մը Եւս Կարեւոր Նկատած Է Ուսուցիչին Դերը

«Որեւէ փոփոխութիւն կատարելէ առաջ պէտք է յստակօրէն ձեւակերպել նպատակը. ինքնանպատակ շարժումը կործանարար է կրթութեան համար, քանի որ մեր համակարգին մէջ բարեփոխումներու արդիւնքը 5-10 տարի ետք կ'երեւի: Մենք կ'ուզենք, որ անոնք ըլլան լաւ մտածուած, յստակ եւ ժամանակի թելադրանքով», նշած է Հայաստանի Հանրապետութեան կրթութեան եւ գիտութեան նախարար Լեւոն Մկրտչեան օգոստոսեան խորհրդակցութիւններուն շրջագիծին մէջ Միւնիքի մարզի կրթութեան պատասխանատուներուն հետ հանդիպումի մը ընթացքին:



Ներկայացնելով բարեփոխումներու իրականացման կառուցուածքը՝ նախարարը այդ գործին մէջ կարեւոր նկատած է ուսուցիչին դերը՝ շեշտելով. «Ներկայացնելով «Ուսուցիչ» նախաձեռնութիւնը՝ քարոզչութեան ցանկութիւն չունինք, այլ պարզապէս կ'ուզենք դիմել կրթութեան մարզի ամէնէն կարեւոր հատուածին՝ ուսուցչութեան, որ անկախութեան առաջին իսկ օրէն առանց պատշաճ վարձատրութեան, առաքելութեան գիտակցումով կը կատարէ իր պարտականութիւնը: Կ'ուզենք մշակել քաջալերական համակարգ, որ պիտի նպաստէ ուսուցիչի մասնագիտական որակի բարձրացման, անոր ընկերային վիճակի բարելաւման եւ նախանշէ հեռանկարային զարգացումները՝ նպաստելով ուսուցիչի հեղինակութեան վերականգնման», աւելցուց Լեւոն Մկրտչեանը՝ կոչ ուղղելով ուսուցչութեան՝ բովանդակային քննարկումներու ընթացքին աշխուժութիւն ցուցաբերելու, խօսքէն անցնելու գործի եւ գործնական ծրագիր ներկայացնելու:

Անդրադառնալով ուսուցիչներու տարակարգերուն, դպրոցներու ընտրութեան հարցին՝ նախարարը նշած է. «Անշուշտ, ուսուցիչ ըսելով՝ ես նաեւ տնօրէնը նկատի ունիմ: Երբ ընտրութենէ ընտրութիւն մենք անոնց հպարտութիւնը կը հարուածենք, չենք կրնար ակնկալել, որ անոնք մեր զաւակները, երիտասարդները ճիշդ դաստիարակեն: Մենք պէտք է կարենանք դպրոցական համակարգը դարձնել բոլորին հոգածութեան առարկան, իսկ աստիկա պէտք է սկսիլ ուսուցիչով»:

Միւնիքի մարզ կատարած այցելութեան ընթացքին նախարար Լեւոն Մկրտչեան այցելած է նաեւ Գորիսի պետական համալսարան, ծանօթացած իրականացուող կրթական ծրագիրներուն եւ համալսարանի կարելիութիւններուն: Նախարարը հանդիպում ունեցած է համալսարանի դասախօսական կազմին անդամներուն հետ, պատասխանած զանոնք յուզող բոլոր հարցումներուն:

## Չինարիի Մէջ Ագրպէյճանի Կրակ Բացած Է ԵԱՀԿ-ի Դիտորդներուն Ուղղութեամբ

Չորեքշաբթի օր, Հայաստանի եւ Ագրպէյճանի սահմանին իրականացուած ԵԱՀԿ-ի առաքելութեան դիտարկման ընթացքին, թշնամիի զինուած ուժերը խախտած են զինադադարը:

«Ազրպեյճանի զինուած ուժերը կրակ բացած են ԵԱՀԿ-ի դիտարկման ժամանակ», «Թուլիթըր»-ի իր էջին վրայ գրած է Հայաստանի արտաքին գործոց նախարարութեան մամլոյ քարտուղար Տիգրան Բալայեան:

Դիտարկումը տեղի ունեցած է Տաուշի մարզի Չինարի գիւղին ուղղութեամբ:

«Երկիր»-ի հետ զրոյցի մը ընթացքին պաշտպանութեան նախարարութեան մամլոյ բանբեր Արծրուն Յովհաննիսեան նշած է, որ խումբը իր աշխատանքը չի կրնար կատարել:

«Ազրպեյճանական կողմը կրակ բացած է խումբին ուղղութեամբ, եւ անոնք փաստօրէն հիմա չեն կրնար իրենց գործը կատարել», յայտնած է ան:

Անդրադառնալով Չինարիի դէպքին Ռուսիոյ արտաքին գործոց նախարարութեան պաշտօնական ներկայացուցիչ Մարիա Չախարովա ըսած է հետեւեալը. «Իրավիճակի սրման պարագային մենք միշտ կոչ կ'ուղղենք կողմերուն՝ հաւասարակշռուած մօտեցում ցուցաբերելու, որուն նպատակը պիտի ըլլար ոչ թէ իրավիճակի լարումը, այլ քաղաքական լուծման հասնիլը: Կը կարծեմ՝ փորձագէտները պիտի ըսեն իրենց խօսքը՝ դէպքի վայրին մէջ ուսումնասիրելով հանգամանքները»:

Պատասխանելով այն հարցումին, թէ արդեօք ժամանակը չէ՞, որ Ռուսիոյ նախաձեռնութեամբ Արցախի Հանրապետութիւնը դառնայ բանակցային կողմ, Չախարովան ըսած է, որ Ռուսիան ունի իր ասանդական դիրքորոշումը:

Ան նաեւ նշած է, որ ներկայիս տեղեկութիւն չունի Հայաստանի եւ Ազրպեյճանի արտաքին գործոց նախարարներու հաւանական հանդիպումին մասին:

## **Արթուր Աղաբեկեան Ստացաւ «Արցախի Հերոս»-ի Կոչում**

Լեռնային Ղարաբաղի Հանրապետութեան հռչակման 26-րդ տարեդարձին առիթով 31 օգոստոսին նախագահի նստավայրին մէջ տեղի ունեցած է պարգևատրման հանդիսաւոր արարողութիւն:

Արցախի նախագահ Բակօ Սահակեանի հրամանով, ՀՅԴ-ի անդամ, Հայաստանի եւ Արցախի Հանրապետութիւններու պետական եւ զինուորական գործիչ, զօրավար-գնդապետ Արթուր Աղաբեկեանին տրուած է «Արցախի հերոս» Արցախի Հանրապետութեան բարձրագոյն կոչում եւ «Ոսկէ արծիւ» շքանշան՝ պաշտպանութեան կազմակերպման մէջ հայրենիքին մատուցած բացառիկ ծառայութիւններուն, ցուցաբերած քաջութեան ու արիութեան համար:

Այս առիթով արտասանած իր սրտի խօսքին մէջ Արթուր Աղաբեկեան ըսած է, որ «Արցախի հերոս» կոչման արժանանալը մեծ ուրախութիւն ու հպարտութիւն է: «Իմ բոլոր ձեռքբերումներուս համար նախ եւ առաջ երախտապարտ եմ իմ ծնողներուս: Հպարտութեամբ պիտի կրեմ «Ոսկէ արծիւ» շքանշանը՝ իբրեւ 11 հազար հատրութիւններու գնահատանք՝ զայն նկատելով պետական երախտիք 306 նահատակ հերոսներուն, որոնք ոչ մէկ վայրկեան երկմտեցան իրենց կեանքը այսօրուան Արցախին եւ վաղուան միացեալ պետականութեան նուիրելու համար:

«Շնորհակալութիւն նախագահ Բակօ Սահակեանին, իմ մարտական եւ կուսակցական ընկերներուս՝ անկախութեան 26 տարիներուն Արցախին եւ Հայաստանի Հանրապետութեան ծառայելու կարելիութեան ու առիթին համար», ըսած է ան:

**ՄԻՋԱԶԳԱՅԻՆ**

**Ամերիկացի Չինուորներու Եւ Թուրքիոյ Աջակցութիւնը  
Վայելող Չինեալներու Միջեւ Հրացանաձգութիւն՝  
Մընպեժի Մէջ**




Թրքական «Տէյլի Սապահ» օրաթերթը կը հաղորդէ, որ ամերիկեան ղեկավարութեամբ միջազգային դաշինքի Սուրիոյ Մընպեժի քաղաքին մօտ շրջող ուժերուն եւ Թուրքիոյ աջակցութիւնը վայելող Սուրիական ազատ բանակի զինեալներուն միջեւ հրացանաձգութիւն տեղի ունեցած է: Այս մասին երեքշաբթի օր յայտնած է Միջազգային դաշինքի բանբեր գնդապետ Ռայըն Տիլըն:

«Մեր ուժերը կրակոցի թիրախ դարձան եւ հակադարձեցին, ապա հեռացան դէպի ապահով վայր մը», ըսած է ան:

«Դաշինքը Թուրքիոյ յայտնեց, որ իր աջակցութիւնը վայելող ըմբոստներուն ըսէ, թէ ամերիկեան ղեկավարութեամբ դաշնակից ուժերուն վրայ կրակ բանալը անընդունելի է», նշեց Տիլըն:

**Միջազգային Դաշինքը Տէր Զօրի Մէջ Արգելակեց  
Լիբանանէն Ճամբայ Ելած ՏԱՀԵՇ-ի Կարաւանի  
Ուղեւորութիւնը**

«Արապիյէ» հաղորդեց, որ ՏԱՀԵՇ-ի դէմ պայքարի միջազգային դաշինքին օդուժը հարուածած է Լիբանանէն Տէր Զօր ուղղուող ՏԱՀԵՇ-ի կարաւանը՝ աւելցնելով. «Օդային հարուածը կարաւանին ճամբան փակեց»:



Մարդկային իրաւանց սուրիական դիտարանը հաղորդեց, որ նշեալ օդային հարուածը տեղի ունեցած է Տէր Զօրի հարաւը:

Միջազգային դաշինքը հաստատելով լուրը նշեց, որ քանդած է կամուրջ մը եւ ճամբուն վրայ մեծ փոս յառաջացուցած՝ արգելք հանդիսանալու համար, որ ՏԱՀԵՇ-ի կարաւանը շարունակէ դէպի արեւելք իր ուղեւորութիւնը:

Օդային հարուածէն ժամեր առաջ «Նիւ Եորք Թայմզ» հաղորդած էր, որ Միջազգային դաշինքը սպառնացած է հարուածել կարաւանը: Միջազգային դաշինքի բանբեր գնդապետ Ռայըն Տիլըն յայտնած էր, որ Միջազգային դաշինքը կը ճշդէ, թէ կարաւանին մէջ քաղաքայիններ կա՞ն, թէ՞ ոչ:

## Մարդկային Միտքի Վերանորոգման Տարի

Առիթը ունեցայ հանդիպելու Մեծի Տանն Կիլիկիոյ Արամ Ա. վեհափառին, Անթիլիասի մէջ: Ամէն անգամ հիացումս կ'աւելնար իր գաղափարներուն եւ անհատականութեան հանդէպ. ի դէպ, իր մէջ կը տեսնէի մարդկային յատկանիշներ եւ համեստութիւն՝ հակառակ իր մեծութեան: Չուզեցի միջամտել իր խօսքին եւ աւելի արժեքաւոր եւ արդիւնաւէտ նկատեցի մտիկ ընել զինք:

2017 տարուան սկիզբը վեհափառը տարին կոչեց «Վերանորոգման տարի»՝ ըստ տարեկան սովորութեան, ինչպէս որ 2016-ը կոչած էր «Օտարայութեան տարի»: Այսպէս, տարիներէ ի վեր վեհափառը լուսարձակի տակ կ'առնէ գաղափար մը կամ նպատակ մը, որ օգտակար կը դառնայ ժողովուրդներու կեանքին մէջ: Ան հրապարակեց մանրամասն յայտարարութիւն մը, որ լի է մարդկութեան համար իմաստալից եւ օգտաշատ գաղափարներով, արժանի՝ անդրադարձի: Ան իր յայտարարութեան մէջ անդրադարձաւ նաեւ համամարդկային հարցերու, որոնք կ'անդրադառնան ժողովուրդներու եւ անհատներու կեանքին, ու ես արժանի նկատեցի կարգ մը կէտեր ներկայացնել արաբ ընթերցողին:

Յայտարարութիւնը շեշտեց վերանորոգումի անհրաժեշտութիւնը կեանքի բոլոր նիւթական, բարոյական եւ հոգեկան մարզերուն մէջ՝ հաստատելով, որ այդ Աստուծոյ կամքն է: Ան է, որ ստեղծեց տիեզերքը, ստեղծեց մարդը՝ իբրեւ անոր պահապան եւ հովիւ:

Կեանքը իր բոլոր մանրամասնութիւններով պէտք ունի շարունակական վերանորոգումի. հակառակ պարագային, իւրաքանչիւր էակ պիտի կորսնցնէ իր կենսունակութիւնը, գոյութեան իմաստը եւ նպատակը: Այս է, որ կը հաստատեն բոլոր կրօնները եւ փիլիսոփայական վարկածները: Վերանորոգումը շարժիչը ու մնայուն մղիչ ուժն է զարգացումի: Այս պատճառներէն ու պահանջներէն մղուած էր 2017 տարուան ընտրութիւնը՝ որպէս «Վերանորոգումի տարի»: Յայտարարութիւնը ընդգրկեց շատ մը գաղափարներ, որոնցմէ մէկն էր «կղզիացումը՝ յետադիմական գաղափարներու ետին»: Ան կը պահանջէր պահել կրօնական, ազգային արժանիքները եւ առաքինութիւնները: Ան կոչ ըրաւ մարդուն ինքն իր մէջ սկսելու վերանորոգումը, որովհետեւ ան ծանրաբեռնուած է հոգերով եւ դարու սահմանափակումներով: Այս պատճառներով ան բացակայ է իր անձէն եւ կը կորսնցնէ առիթը՝ առանձնանալու եւ ինքն իր մասին մտածելու, որ կը պատճառէ Աստուծոյ պատկերին իր նմանութեան օրինակի կործանումը:

Ան մեջբերում կատարեց ֆրանսացի մեծ մտաւորական, «Այս անորոշ մարդը» գիրքի հեղինակ դոկտ. Ալէքսիս Քարելիէն, ուր ան կը յայտնէ, որ մարդը առանց զԱստուծոյ ճանչնալու՝ կ'անգիտանայ իր անձին գոյութեան իմաստը: Վերանորոգումը կը սկսի իր անձը ճանչնալով եւ Աստուծոյ հրաւերին ընդառաջելով:

Վեհափառը անդրադարձաւ նաեւ աշխարհիկ հարցերու, ինչպէս՝ բնապահպանութեան հարցին: Ան կոչ ըրաւ պահպանելու բնութիւնը, որովհետեւ այդ աստուածային պատուէր մըն է: Ան կ'աւելցնէ նաեւ, որ վերանորոգումը կորսնցուցածը ամբողջացնել կամ սխալը սրբագրել չէ, այլ ճիգ մըն է անցնելու լաւն աւելի լաւին: Մեր անձնական կեանքի ներկայի պայմանները, մեր գործերը եւ անհրաժեշտութիւնը վերատեսութեան ենթարկելու, մեր օգտագործած միջոցները անցնելու համար հինէն նորին եւ իրապաշտօրէն նայելու անցեալէն ներկայ ու ճիշդ ձեւով ուղղուելու ներկայէն ապագայ՝ բարենորոգիչ համոզումով եւ ակնարկով: Պահելով ինքզինք սրբագրելու, քննութեան ենթարկելու եւ հաշուետուութիւն կատարելու անհրաժեշտութիւնը, այս ձեւը օգտագործելով որպէս կենսակերպ:

Իր յայտարարութեան վերջին մասին մէջ վեհափառը իր խօսքը ուղղեց հայ ժողովուրդին, որ աշխարհին մաս կը կազմէ, կոչ ուղղելով անոր պահելու իր մարդկային ու կրօնական առաքինութիւնները՝ առաջնորդուելով մեր ազգային առաջնահերթութիւններէն:

**ԿԻՐԱԿՈՍ ԳՈՒՅՅՈՒՄՃԵԱՆ**



ԱՆԴՐԱԴԱՐՁ

## Խառնաշփոթ Իրավիճակ

Թուրքիան յարաբերություններ մշակած է իրարու հակառակորդ կողմերու հետ՝ Միացեալ Նահանգներու եւ Ռուսիոյ, Իսրայէլի եւ Իրանի: ՕԹԱՆ-ի անդամ ըլլալով ան բնականաբար անդամ է արեւմտեան ճամբարին, եւ նշեալ ճամբարէն անոր թէկուզ եւ մասնակի հեռացումը Ուաշինկթընի համար դժգոհութեան աղբիւր է, իսկ Մոսկուայի համար՝ գոհունակութեան:

Իսրայէլի եւ Իրանի հետ Թուրքիոյ յարաբերություններուն մէջ սակայն ստեղծուած է այլ պատկեր մը: Այդ անջատ յարաբերությունները կասկածներ ու անվստահութեան մթնոլորտ կը ստեղծեն թէ՛ Թէլ Աւիւի, թէ՛ ալ Թեհրանի մօտ, մանաւանդ որ երկուքին հետ ալ Անգարայի յարաբերությունները արդէն այնքան ալ փայլուն չեն: Այդ մթնոլորտը ինքնին կը սահմանափակէ յարաբերություններու զարգացման տարողությունն ու որակը:

Թրքական կողմը դժգոհ է, որ արեւմտեան ճամբարը իր կամքը չի կատարեր, սակայն 23 օգոստոսին Իրանէն ստացած ապտակը եկաւ անոր յիշեցնելու, թէ Արեւմուտքին հակառակորդ կողմը եւս «իր կամակատարը» չէ: Թուրքիոյ նախագահ Ռեճեփ Թայիփ Էրտողան յայտարարեց, որ Իրանի հետ Սուրիոյ եւ Իրաքի մէջ քիւրտ զինեալներուն դէմ միացեալ զինուորական գործողութիւն մը օրակարգի վրայ է: Սակայն Իրանի Յեղափոխական պահակագունդը հերքեց, թէ Իրաքի քիւրտներուն դէմ միացեալ զինուորական գործողութիւն մը կը ծրագրէ՝ նշելով. «Մենք Իրանի սահմանէն դուրս որեւէ գործողութիւն չենք ծրագրած»: Իրանեան հերքումը, սակայն, կրնայ նաեւ յիշեցում մը ըլլալ, թէ Էրտողան Իրանի անունով յայտարարություններ կատարելու իրաւասութիւնը չունի:

Այժմու փուլը երկարատեւ չէ: Քրտական ազդակը Թուրքիոյ եւ Իրանի մօտ ստեղծած է հասարակաց, սակայն ժամանակաւոր շահեր: Այլ հարցերու մէջ երկու կողմերուն միջեւ արմատական տարակարծությունները կը յամենան: Նոյնն է պարագան Ռուսիոյ, Իսրայէլի եւ Միացեալ Նահանգներու հետ յարաբերություններուն պարագային: Մարտավարական ու ռազմավարական շահերու ժամանակաւոր համընկնումի այս խառնաշփոթ կացութիւնը, սակայն, երկարատեւ չի կրնար ըլլալ եւ ի վերջոյ վերջ պիտի գտնէ. Անգարան պիտի ստիպուի ընտրություն կատարել, Ռուսիան՝ թէ՛ Միացեալ Նահանգները, Իրանը, թէ՛ Իսրայէլը, Արեւմուտքը, թէ՛ Արեւելքը:

Անգարան այլ երկիրներու նման համալրման քաղաքականութիւն վարելու կարելիութիւնը չունի, որովհետեւ արդէն լիարժէք անդամ է ՕԹԱՆ-ի՝ իննստ արեւմտեան ճամբարին: Անոր համար կը գործէ միայն մէկ օրէնք՝ «ինծի հետ կամ ինծի դէմ»-ը: Միւս կողմէ, նշեալ երկիրներուն համբերությունը կրնայ հատիլ. անոնք կրնան Թուրքիոյ չսպասել եւ իրենք այդ ընտրանքը կրնան կատարել անոր տեղ: Այդ պարագային Անգարա կրնայ յանկարծ ինքզինք գտնել Միացեալ Նահանգներու եւ Արեւմուտքի հետ իր ներկայ ռազմավարական յարաբերություններէն մերկացած վիճակի մը մէջ:

ՎԱՀՐԱՍ ԷՄՄԻԵԱՆ

**WWW.AZTAGDAILY.COM**  
**WWW.AZTARAR.COM**

## ԱԿՆԱՐԿ

# Վերականգնումի Ծրագիր

20-23 ապրիլ 2017-ին տեղի ունեցավ Նորվեկիոյ Աշխատատրական կուսակցութեան տարեկան ժողովը: Այս ժողովը իւրայատուկ էր իր բնոյթով, որովհետեւ չորս տարին անգամ մը տարեկան ժողովը կը մշակէ կուսակցութեան ընտրական ծրագիրը: Այս ծրագիրը ի գորտու կը մնայ կուսակցութեան ամբողջ գործունէութեան համար՝ յաջորդ չորս տարիներուն ընթացքին, եւ անոր պէտք է հետեւի կուսակցութիւնը՝ ազգային եւ տեղական մակարդակներու վրայ:



Աշխատատրական կուսակցութիւնը ծանօթ է Նորվեկիոյ բարեկեցիկ համակարգի կերտումի իր յատուկ դերակատարութեամբ: Անոր առաջնորդութեամբ էր, որ Նորվեկիան դարձաւ աշխարհի ամենէն հարուստ պետութիւններէն մէկը, եւ աղքատութիւնը անհետացաւ երկրին մէջ:

Աշխատատրական կուսակցութիւնը ընտրութիւններուն ընթացքին վերստին օգտագործեց իր ականդական նշանաբանը, որն է՝ «Բոլորը պէտք է մասնակից դառնան»: Այս նշանաբանով կը շեշտուի, որ Նորվեկիոյ բոլոր բնակիչները՝ առանց սեռի, կրօնի, գոյնի կամ ծննդավայրի խտրականութեան, պէտք է մաս կազմեն երկրին զարգացման երթին: Ծրագիրը կը սկսի «Մեր արժէքները եւ մեր ժամանակը» խորագիրով, որ յառաջաբանն է:

«Աշխատատրական շարժումը պայքարեցաւ, որպէսզի ժողովուրդը ստանայ գիտութիւն, բարեկեցութիւն եւ տէրը դառնայ երկրի հարստութիւններուն», կը նշէ յառաջաբանը՝ աւելցնելով. «Այսօր մենք այս բոլոր ձեռքբերումները վտանգուած կը տեսնենք. ընկերային բաժանումները աւելցած են, տնտեսական աճը կանգ առած է, անգործութիւնը աճ արձանագրած է, եւ յաւելեալ մարդիկ հեռացած են: Տնտեսական հեռանկարը մեզմէ կը պահանջէ, որ աւելի յառաջ մղուինք»: Ապա ծրագիրին յառաջաբանը կ'եզրակացնէ. «Այս կուսակցութեան ծրագիրը կը շեշտէ, որ պէտք է օգտուիլ այսօր գոյութիւն ունեցող բոլոր կարելիութիւններէն»:

Վերջին չորս տարիներուն ընթացքին պահպանողական կառավարութիւնը նոր-ազատական խստամբերական քաղաքականութիւն վարեց: Անիկա աւելի եւս խորացուց դասակարգային բաժանումները եւ կրճատեց պետութեան հսկողութեան դերը, որ բացասական երեւոյթ դարձաւ նորվեկիացիներուն համար: Ծրագիրը հետեւեալ տողերով կը քննադատէ նոր-ազատական քաղաքականութիւնները. «Վերջին չորս տարիները կը բնութագրուին անգործութեան բարձր մակարդակով, տնտեսական ցած աճով, հասարակութեան մէջ բաժանումներով եւ քարիւղի եկամուտի անբաւարար բաշխումով»: Այնուհետեւ կ'առաջարկուի քարիւղի եկամուտը ներառել պիւտճէին մէջ նախատեսուած աղքատութեան դէմ պայքարի միջոցառումներուն մէջ, հարկ հաստատել ի նպաստ բնապահպանութեան, հսկողութեան ենթարկել դրամատնային բնագաւառը եւ թափ տալ հարկերու վճարումէն խուսափման դէմ պայքարին:

Աշխատանքի մասին ծրագիրը կը նշէ. «Բոլորին աշխատանքի կարելիութեան ապահովումը թիւ մէկ առաջնահերթութիւնն է Նորվեկիոյ Աշխատատրական կուսակցութեան: Երբ գործ կը ստանաս եւ աշխատանքի կը սկսիս, այս ապահովութիւնը կը հայթայթէ՝ անհատական ազատութիւն, յաւելեալ ընկերային համախմբուածութիւն, յաւելեալ հաւասարութիւն, ինչպէս նաեւ յաւելեալ եկամուտ՝ հասարակութեան: Մենք կ'ուզենք զօրացնել կազմակերպուած, համեստ աշխատանքային կեանքը, ուր հասարակ աշխատատրը պիտի գտնուի աւելի լաւ պայմաններու մէջ»: Ծրագիրը կ'առաջարկէ աշխատանքի շուկայի թուայնացում եւ արդի արհեստագիտութեան որդեգրում, օտար բանուորներու

շահագործման (նուազագոյն աշխատավարձէն պակաս աշխատավարձ վճարել) քրեականացում եւ զօրացնել արհեստակցական միութիւններու դերակատարութիւնը:

Յատկանշական է, որ արդիւնաբերութեան յատկացուած բաժինին մէջ կայ յատուկ կէտ մը՝ «Հանրային հատուածի սեփականատիրութիւն» խորագիրով: Այս կէտը մէջտեղ եկաւ՝ ի հակազդեցութիւն եւ քննադատութիւն պահպանողական կառավարութեան վարած սեփականաշնորհման քաղաքականութիւններուն, որոնք կը ձգտին Նորվեկիոյ ազգային հարստութիւնները յանձնել համաշխարհային մեծ ընկերութիւններուն: Ակնյայտ դարձաւ, որ այս քաղաքականութիւններուն պատճառով Նորվեկիոյ մէջ անգործութեան համեմատութիւնը աճ արձանագրեց: Այդ կէտին մէջ կ'ընդգծուի. «Նորվեկիոյ մէջ բազմաթիւ մեծ ընկերութիւններ պետութեան սեփականութիւնն են. ասիկա կ'ապահովէ հանրութեան սեփականատիրութիւնը՝ կարելորագոյն ենթակառուցուածքներուն եւ ազգային հարստութիւններուն: Հանրային սեփականատիրութիւնը նաեւ կը նշանակէ, որ բարձր որակի կեդրոնները, փոխանակ երկրէն դուրս գալու, կը մնան Նորվեկիոյ մէջ: Այս իրողութենէն մեկնելով՝ Նորվեկիոյ Աշխատատրական կուսակցութիւնը «Ոչ» կ'ըսէ ռազմավարական կարելոր ընկերութիւններու սեփականաշնորհման»: Արդիւնաբերական մարզին մէջ ծրագիրը կ'առաջարկէ՝ ռազմավարական կարելորութիւն ունեցող արդիւնաբերական ընկերութիւններու, ազգային հարստութիւններու եւ ենթակառուցուածքներու հանրային սեփականատիրութիւն, երկաթուղային հատուածի հանրային սեփականատիրութիւն, հանրային հատուածի զարգացում եւ վերանորոգուող ուժանիւթի յաւելեալ օգտագործում:

Կրթական մարզն ալ նոյնպէս ենթարկուեցաւ պահպանողականներու նոր-ազատական սեփականաշնորհման քաղաքականութիւններուն: Բազմաթիւ դպրոցներ սեփականաշնորհուեցան, իսկ աշխատատր համեստ ընտանիքներու զաւակները զրկուեցան կրթութիւն ստանալու իրաւունքէն: Աշխատատրական կուսակցութեան ծրագիրը կը շեշտէ. «Հանրային դպրոցները եւ կրթութիւն ստանալու հաւասար իրաւունքները կարելոր ազդակներ են, որպէսզի բոլորին ալ ապահովուին հաւասար կարելիութիւններ»: Առ այդ, ծրագիրը կ'առաջարկէ վերջ տալ դպրոցներու սեփականաշնորհման հոլովոյթին, յատուկ արտակարգ ծրագիր մը մշակել՝ պայքարելու ընդդէմ ատելութեան խօսքի եւ յաւելեալ ներդրումներ կատարել կրթական բնագաւառի թուայնացման, բարձրագոյն կրթութեան եւ ուսումնասիրական բնագաւառներուն մէջ:

Առողջապահութիւնն ու կենսաթոշակն ալ նոյնիսկ հեռու չմնացին նոր-ազատական վայրագ քաղաքականութիւններէն: Առաջին բնագաւառը ենթարկուեցաւ սեփականաշնորհման, իսկ երկրորդը՝ խստամբերութեան: Աշխատատրական կուսակցութեան ընտրական ծրագիրը անդրադառնալով առողջապահութեան՝ կը նշէ. «Նորվեկիոյ Աշխատատրական կուսակցութիւնը երկրին մէջ պիտի ստեղծէ աւելի զօրաւոր առողջապահական համակարգ: Հիւանդութիւններու կանխարգիլմամբ, վաղաժամ միջամտութեամբ եւ համապատասխան բուժումով դուք պիտի ստանաք ամէնէն լաւ օգնութիւնը հանրային առողջապահական ծառայութիւններէն»: Կուսակցութիւնը նաեւ կ'առաջարկէ՝ կանխել հիւանդանոցներու սեփականաշնորհումը, օգտագործել քարիւղի եկամուտը՝ ամսաթոշակի ապահովման մէջ, ներառել հաշմանդամներուն մուտքը աշխատանքի շուկային մէջ եւ թմրամոլութեան հարցը լուծել առողջապահութեան միջոցով, այլ ոչ թէ՛ պատժողական:

Այս ծրագիրին ընդմէջէն Աշխատատրական կուսակցութիւնը յաւակնութիւնը ունի վերականգնելու Նորվեկիան, որ տասնամեակներու ընթացքին հանդիսացած էր աշխարհի ամէնէն բարեկեցիկ պետութիւնը: Ըստ վերջին տուեալներուն, աշխատատրականները (Նորվեկիոյ արտաքին գործոց նախկին նախարար Եոնաս Կար Մթուրբի առաջնորդութեամբ) շատ մեծ յոյսեր ունին յաղթելու ընտրութիւններուն, որոնք տեղի պիտի ունենան 11 Սեպտեմբեր 2017-ին:

**ՆԱԹԱՆ ՊԵՏՐՈՍԵԱՆ**

**ԼՈՒՐԵՐ ԳԱՂՈՒԹՆԵՐԷՆ**

**Լիզպոնի Հինգ Անձնագոհ Սարտիկներու Յիշատակին  
Նուիրուած Ֆութպոլի Խաղեր**



Նախաձեռնութեամբ Նոր Ջուղայի ՀՄՄ «Արարատ» միութեան Սկաուտական միաւորի Գերագոյն մարմինին եւ կազմակերպութեամբ սկաուտներէ կազմուած գործադիր յանձնախումբին, 5 օգոստոսին միութեան մարզասրահին մէջ տեղի ունեցաւ Լիզպոնի հինգ մարտիկներուն նուիրուած ֆութպոլի մրցաշարքի բացման հանդիսութիւնը:

Բացման խօսքով հանդէս եկաւ սկաուտ Վանիա Պետրոսեանը, որմէ ետք Գերագոյն մարմինի խօսքը կարդաց Թանգիկ Միրզախանեանը: Այնուհետեւ տեղի ունեցաւ «Արարատ» եւ «Գանձասար» խումբերուն միջեւ խաղը:

Նշենք, որ այս մրցաշարքը ամենամեայ կարգով տեղի կ'ունենայ Նոր Ջուղայի մէջ: Անոր կը մասնակցին համայնքի երիտասարդներէն կազմուած ֆութպոլի սիրողական խումբեր: Հինգ օր տեւած խաղերուն մասնակցեցան «Արարատ», «Սարդարապատ», «Գանձասար», «Գետաշէն» եւ «Վիշապ» խումբերը: Խաղերուն փակումը տեղի ունեցաւ 9 օգոստոսին:

Մրցաշարքի մասնակիցները գնահատելու եւ արժեւորելու նպատակով 11 օգոստոսին, Նաւասարդի տօնին առիթով, կազմակերպուած հանդիսութեան ընթացքին շնորհակալագիրներ յանձնուեցան մասնակից մրցավարներուն, իսկ առաջին եւ երկրորդ տեղերը գրաւած «Սարդարապատ» եւ «Արարատ» խումբերուն յանձնուեցան գնահատագիրներ եւ յուշանուէրներ:

**Արցախի 22 Պատանիներ Կը Հիւրընկալուին  
Սիրոսի Մէջ՝ Ամրան Իրենց Արձակուրդին Համար**

Այս տարի եւս պահպանուեցաւ արցախեան հերոսամարտին զոհուած ազատամարտիկներու զուակները, ամրան արձակուրդին համար, Յունաստանի մէջ հիւրասիրելու մարդասիրական գեղեցիկ աւանդութիւնը, որ 20 տարիէ աւելի կը շարունակուի:

ՀՅԴ Յունաստանի Հայ դատի յանձնախումբին նախաձեռնութեամբ, ինչպէս նաեւ Լեոնային Ղարաբաղի արտաքին գործոց եւ կրթութեան նախարարութիւններու կազմակերպութեամբ ու Սիրոսէրմուփոլիի քաղաքապետարանի հրաւերով՝ արցախեան հերոսամարտին զոհուած հայ ազատամարտիկներու 22 երեխաներ, մեծամասնութիւնը՝ Արցախի գիւղերէն ու 10-էն 16 տարեկան, հրաւիրուեցան Յունաստան եւ այս օրերուն կը հիւրընկալուին Սիրոս կղզիին մէջ:



Արցախահայ պատանիները 21 օգոստոս 2017-ին Աթենք ժամանեցին եւ մինչեւ 23 օգոստոս հիւրընկալուեցան Խաճիքիքիաքիո հաստատութեան մէջ, որ ինչպէս ամէն տարի, մեծ հոգատարութիւն եւ գուրգուրանք կը ցուցաբերէ մեր երեխաներուն հանդէպ, անոնց տրամադրելով անհրաժեշտ բոլոր յարմարութիւնները՝ լաւ ժամանակ անցընելու նպատակով:

23 օգոստոսին խումբը ճամբայ ելաւ դէպի Սիրոս կղզի՝ ընկերակցութեամբ իրենց պատասխանատուին, ինչպէս նաեւ՝ Հայ դատի յանձնախումբի ընկեր-ընկերուհիներուն: Սիրոսի՝

իրենց կեցութեան վայրին մէջ արցախահայ պատանիները բարձրացուցած են Արցախի, Յունաստանի եւ Եւրոպական Միութեան պետական դրօշակները: Օրուան ընթացքին անոնց կը դասաւանդուին յունական ժողովրդային պարեր, որոնք մեծ խանդավառութեամբ կ'ընկալուին երեխաներուն կողմէ: Ամէն առաւօտ եւ յետմիջօրէի անոնք ծովը կը վայելեն՝ ուրախ եւ անհոգ ժամեր անցընելով: Կ'ունենան նաեւ զանազան այցատոյտներ՝ դէպի կղզիի գեղատեսիլ վայրեր: Սեպտեմբեր 4-ին խումբը պիտի վերադառնայ Աթենք, ուր տղոց կեցութիւնը ապահովուած է դարձեալ Խաճիքիքիաքիո հաստատութեան մէջ, մինչեւ Սեպտեմբեր 7-ը, երբ նախատեսուած է անոնց վերադարձը Արցախ:

## Լոյս Տեսաւ

### «Առաջին Երգարանս» Մանկական Երկլեզու Երգարանը

Վերջերս լոյս տեսաւ «Առաջին երգարանս» խորագրուած հայերէն եւ անգլերէն երգերու մանկական երգարանը՝ հեղինակութեամբ Քալիֆորնիոյ համալսարանի Լոս Անճելըսի մասնաճիւղին մէջ երաժշտութեան դասախօս դոկտ. Քարեն Չուրճեան-Փրեսթիի:

Դոկտ. Քարեն Չուրճեան-Փրեսթի ունի այն համոզումը, որ երգը լաւագոյն միջոցն է նոր լեզուներու ծանօթացման:



Գիրքին կ'ընկերանայ սկաւառակ մը, որուն մէջ հատորին երգերը կ'երգէ Սթեֆընի Չուրճեան, դաշնակի ընկերակցութեամբ անոր քրոջ՝ Քարենին:

Երգերուն մէկ մասը հայկական, ամերիկեան, գերմանական եւ անգլիական աւանդական երգեր են, որոնք թարգմանուած են հեղինակին կողմէ, իսկ մնացեալները գրուած են հեղինակին կողմէ:

Հատորին գծագրութիւնները կատարած է Էլիսթըր Սետլըրը:

## ՄՏՈՐՈՒՄՆԵՐ

Շարադրե՞լ կամ բառերով բացատրե՞լ, հեշտ չէ բնաւ... Անկեղծօրէն, բառերս անբաւարար են արտայայտելու երախտագիտական զգացումներս...

Մասնակից դառնալով երիտասարդական միջ-թեմական համագումարին, պարտք կը զգամ խորին շնորհակալութիւններս յայտնել, առաջին հերթին՝ Ն.Ս.Օ.Տ.Տ. Արամ Ա. Վեհափառ Հայրապետին, Կիլիկիոյ Կաթողիկոսութեան երիտասարդական բաժանմունքին, Հոգեշնորհ Հայր Սուրբերուն և վերջապէս բոլոր այն գործակիցներուն, որոնք ներդրում ունեցան սոյն համագումարի յաջողութեան:



Մասնակից հինգ թեմերուն միջև, զեկուցուեցան և արծարծուեցան տարբեր տեսակի մարտահրաւերներ, որոնք կը մտահոգեն այսօրուան Հայ երիտասարդը զանազան գաղութներէ ներս, Եկեղեցի-երիտասարդ կապի բնոյթը, ինչպէս նաև փոխանակուեցան կարծիքներ ու հնչուեցան շինիչ առաջարկներ:

Աւելին, մենք՝ համախմբուած երիտասարդներս դարձանք մէկ ընտանիք, քաջ գիտակցելով մեզ միացնող ուժերը, որոնցմէ հօգօրագոյնն ու կարևորագոյնը մեր Հայ ինքնութիւնն էր, որուն կողքին հարկ է նաև յիշել, մեր Հայապահպանման Սուրբ առաքելութիւնը և մեր հաւատքը:

Անժխտելի է, որ աւելի քան երեսուն երիտասարդներ, մէկտեղուած էինք զանազան երկիրներէ, բայց կաթողիկոսարանին շեմէն ներս մեր կեցութիւնը անբացատրելիօրէն հարազատ էր ու կեանքի հազուագիւտ մէկ փորձառութիւն...

Այդ երեք օրերու տեւողութեան, մեր նիստերը, ընկերային զրոյցները և համեստ Հայր Սուրբերուն հոգևոր խորհուրդները դարձան մեր բոլորին կեանքերուն կարևոր մէկ մասնիկը. այնպէս որ, իւրաքանչիւրիս համար չափազանց դառն էր այդ շատ վաղ հրաժեշտի պահը...

Այո՛, մենք հրաժեշտ տուինք, սակայն մեզ հետ վերցուցինք այն հարուստ գաղափարներն ու արժանիքները, ուխտելով վերանորոգել մեր անձերը և զարգացնել այն ուղին, որուն ընդմէջէն կը գոյատևէ իւրաքանչիւր Հայ, ի մտի ունենալով մեր հաւատքը, որպէս առաջնահերթութիւն:

Երիտասարդական միջ-թեմական Համագումար... հազուագիւտ էիր և անմոռանալի... Կարօտագին սրտով՝ մնաս բարով...

**Ռիթա Տէկիրմենճեան**

**ԱՅԼԱԶԱՆ**

**Երեխաներու Դաստիարակութիւն. Ծնողական 6  
Սխալներ, Որոնցմէ Պէտք է Խուսափիլ**

Բոլոր ծնողները լաւագոյնը կը ցանկան իրենց զաւակներուն, բայց յաճախ ծնողական սէրը կը կուրցնէ, եւ անոնք կը գործեն սխալներ, որոնք երեխան կը դարձնեն կամակոր, քմահաճ եւ ոչ ինքնաբաւ: Ստորեւ՝ 6 սխալները:

- 1 -



**Երկրորդ կերակուր մը պատրաստել երեխային...**

Եթէ ամբողջ ընտանիքին համար կերակուր պատրաստուած է, իսկ երեխան կը մերժէ ուտել, պէտք չէ զիջիլ եւ ենթարկուիլ անոր քմահաճոյքին ու երկրորդ կերակուր մը պատրաստել անոր համար: Շատ կանուխէն երեխան պէտք է վարժուի ուտել մօր կողմէ սիրով եւ հաճոյքով պատրաստուած սննդարար ուտելիքները:

- 2 -

**Կռկել երեխային սենեակը...**

Սկիզբը ծնողքին օգնութեամբ, ապա երեխան ինքնուրոյն պէտք է կռկէ իր սենեակը: Կանուխէն ան պէտք է վարժուի խաղալիքները հաւաքելու, զիրքերը իրենց տեղերը շարելու, կօշիկները գոյգելու, մահճակալը ծածկելու...

- 3 -

**Երեխային փոխարէն կատարել անոր տնային աշխատանքները...**

Մեծագոյն սխալն է երեխային տնային աշխատանքները կատարելը. այդպիսով, ան կը զրկուի կեանքի դժուարութիւնները ինքնուրոյն դիմագրաւելու հնարաւորութենէն: Քանի մը միջամտութիւն, ցուցմունք ընդունելի են, բայց դասերը երեխային փոխարէն կատարելը աններելի մեծ սխալ է:

- 4 -

**Ծրագրել երեխային օրը...**

Պէտք չէ ստիպել երեխային յաճախել այս կամ այն ակումբը, երաժշտանոցը, արուեստի դպրոցը... Յաճախ ծնողները կ'ուզեն իրենց երեխաներուն միջոցով իրականացնել սեփական

անկատար երազանքները: Երեխային համար որեւէ խմբակ ընտրելու ատեն պէտք է նկատի առնել անոր ունակություններն ու նախասիրությունները:

– 5 –

### Հագցնել երեխան...

Խօսքը շատ փոքրերու չի վերաբերիր: Աւելի մեծ տարիքի երեխաները պէտք է հագուին այնպէս, ինչպէս կ'ուզեն: Հագուստի ընտրությունը անհատականութեան զարգացման մէկ դրսեւորումն է:

– 6 –

### Լուծել երեխային հարցերը...

Ասիկա ծնողներուն ամենատարածուած սխալն է: Երեխաները պէտք է կարենան իրենց հարցերը լուծել առանց կողմնակի օգնութեան: Այսպիսով, երեխաները կը ծանօթանան կեանքի դժուարություններուն, իրենց յարաբերություններուն մէջ կ'երթան փոխզիջումներու, բայց նաեւ կը պաշտպանեն իրենց իրաւունքները:

## ՎԵՐԱՄՈՒՏ

Յարգելի Շնորհներ,  
Սիրելի Աշակերտ-Աշակերտուհիներ,

Ուրախութեամբ կը տեղեկացնենք, որ Քուէյթի Ազգային Վարժարանի 2017-2018 ուսումնական տարեշրջանի վերամուտը տեղի պիտի ունենայ Կիրակի, 17 Սեպտեմբեր 2017ին, բոլոր կարգերուն համար (Մանկապարտէզ, Նախակրթարան, Միջնակարգ եւ Երկրորդական):

Պարտին բոլոր աշակերտները ճիշդ ժամուն դպրոց գտնուիլ:

- \* Արձանագրությունները կը սկսին երեքշաբթի, 5 Սեպտեմբեր 2017ին: Կը խնդրուի բոլոր ծնողներէն մինչեւ Սեպտեմբերի աւարտը անյապաղ կատարեն իրենց գաւակներու արձանագրությունները (ներառեալ Օթոքարի վճարումները), թէ ոչ ստիպուած պիտի ըլլանք աշակերտին չընդունիլ վարժարանէն ներս:
- \* Առաջին օրը հարկ է որ ամէն աշակերտ իր անձնական միջոցով դպրոց յաճախէ, իսկ վերադարձը պիտի ըլլայ օթոքարներով:

Լիայոյս ենք, որ միասնական ջանքերով արդիւնաւէտ տարեշրջան մը կը բոլորենք:

Բարի վերամուտ եւ յաջող երթ կը մաղթենք մեր աշակերտութեան:

Քուէյթի Ազգային Վարժարանի  
Տնօրէնություն եւ Հոգաբարձություն